

«РЎЙХАТГА ОЛИНГАН»  
Ўзбекистон Республикаси  
Марказий банки томонидан

2019 йил «21» август

70 -сон

Ўзбекистон Республикаси  
Марказий банки  
Раёсатининг ўринбосари




Б. Захидов

«Ravnaq-bank»  
ХУСУСИЙ АКЦИЯДОРЛИК  
ТИЖОРАТ БАНКИНИНГ  
УСТАВИ  
(янги таҳрири)

Банк Акциядорларининг  
2019 йил 17 июндаги  
умумий йиғилиши томонидан  
(38/2019-сонли баённома)

«ТАСДИКЛАНГАН»



Ш.А. Пулатов

ТОШКЕНТ – 2019

## I. УМУМИЙ ҚОИДАЛАР

1. «Ravnaq-bank» Хусусий акциядорлик тижорат банки (кейинчалик «Банк» деб юритилади) акциядорлик жамияти шаклида фаолият кўрсатувчи кредит ташкилоти ҳисобланади.

2. Банк таъсисчилар йиғилишининг (2000 йил 26 апрел 001/2000-сонли баённома) қарорига биноан очик акциядорлик банк шаклида ташкил қилинган.

3. Банк ўз фаолиятида Ўзбекистон Республикаси Конституцияси, Ўзбекистон Республикаси Фуқаролик кодекси ва Ўзбекистон Республикасининг «Банклар ва банк фаолияти тўғрисида», «Ўзбекистон Республикасининг Марказий банки тўғрисида», «Қимматли қоғозлар бозори тўғрисида», «Акциядорлик жамиятлари ва акциядорларнинг ҳуқуқларини ҳимоя қилиш тўғрисида»ги қонунлари ва бошқа қонунлар, Ўзбекистон Республикаси Олий Мажлиси палаталари қарорлари, Ўзбекистон Республикаси Президентининг фармон, қарор, фармойишлари, Ўзбекистон Республикаси Вазирлар Маҳкамаси қарорлари, Ўзбекистон Республикаси Марказий банкининг меъёрий ҳужжатлари ва бошқа қонун ҳужжатларига, шунингдек мазкур Уставга амал қилади.

4. Банк Ўзбекистон Республикасининг банк тизими таркибига киради.

5. Банкни ташкил қилиш ва фаолиятдан мақсад - Ўзбекистон Республикаси ҳудуди ва ундан ташқарида амалдаги қонун ҳужжатларида таъқиқланмаган банк ва молиявий фаолиятни амалга ошириш, шунингдек фойда олиш мақсадида юқорида кўрсатилган фаолият билан боғлиқ бўлган хизматларни кўрсатиш ҳисобланади.

6. Банкнинг тўлиқ номи:

ўзбек тилида:

кирилл ёзувида: «Ravnaq-bank» хусусий акциядорлик тижорат банки;

лотин ёзувида: «Ravnaq-bank» xususiy aksiyadorlik tijorat banki;

рус тилида: Частный акционерный коммерческий банк «Ravnaq-bank»;

инглиз тилида: Private joint stock commercial bank «Ravnaq-bank».

Банкнинг қисқартирилган номи:

ўзбек тилида:

кирилл ёзувида: «Ravnaq-bank» ХАТБ;

лотин ёзувида: «Ravnaq-bank» ХАТВ;

рус тилида: ЧАКБ «Ravnaq-bank»;

инглиз тилида: PJSCB «Ravnaq-bank».

7. Банк юридик шахс ҳисобланади ва ўзининг мустақил балансида ҳисобга олинадиган алоҳида мол-мулкка эга бўлади, ўз мажбуриятлари юзасидан ушбу мол-мулк билан жавоб беради, ўз номидан мулккий ва шахсий номулкий ҳуқуқларни олиши ҳамда амалга ошириши, зиммасига мажбуриятлар олиши, судда даъвогар ва жавобгар бўлиши мумкин.

8. Банк белгиланган тартибда Ўзбекистон Республикаси ҳудудида юридик шахс ҳуқуқини бермаган ҳолда ўз филиалларини ташкил қилиши, қонун ҳужжатларида назарда тутилган ва Банк уставида белгиланган қоидалар доирасида уларга ҳуқуқлар бериши мумкин.

Филиаллар Банк Кенгаши томонидан ташкил қилинади. Филиаллар давлат тилидаги ўз номи ёзилган думалоқ муҳрга, штампга ва ўз номидаги бланкаларга эга.

Филиаллар Банк номидан фаолият юритадилар. Банк ўз филиаллари фаолияти учун жавобгар бўлади. Филиал Бошқарувчилари банк томонидан берилган ишончнома асосида фаолият юритадилар. Банк номидан ишончнома Банк Бошқаруви Раиси ёки унинг ўрнини босувчи шахс томонидан берилади.

Филиаллар ўз фаолиятларини Банк Кенгаши тасдиқлаган Низом асосида амалга оширадилар.

Банк Ўзбекистон Республикаси Марказий банкининг (кейинчалик «Марказий банк» деб юритилади) рухсати билан мамлакат ташқарисида филиаллар ва ваколатхоналар очиши мумкин. Банк томонидан Ўзбекистон Республикасидан ташқарида филиалларни тузиш ва ваколатхоналарни очиш филиаллар ва ваколатхоналар турган жойдаги давлат қонунчилигига асосан амалга оширилади.

9. Банк маблағларининг сақланиши ҳамда омонатчилар олдидаги мажбуриятларининг бажарилиши учун, шу жумладан тўловлар бир банкдан бошқа банкка ўз вақтида ўтиши ҳамда маблағларнинг корхоналар ва ташкилотлар ҳисоб-китоб варақларига киритилиши учун ўз мижозлари ва омонатчилари олдида жавобгардир.

Акциядорлар Банкнинг мажбуриятлари юзасидан жавобгар бўлмайди ва унинг фаолияти билан боғлиқ зарарларнинг ўрнини ўзларига тегишли акциялар қиймати доирасида қоплаш таваккалчилигини ўз зиммасига олади.

Акциялар ҳақини тўлиқ тўламаган акциядорлар Банк мажбуриятлари юзасидан ўзларига тегишли акциялар қийматининг тўланмаган қисми доирасида солидар жавобгар бўладилар.

Банк ўз акциядорларининг мажбуриятлари юзасидан жавобгар бўлмайди.

Давлат ва унинг органлари Банк ўз зиммасига олган мажбуриятлар юзасидан жавобгар бўлмайдилар, худди шунингдек Банк ҳам давлат ва унинг органлари олган мажбуриятлар юзасидан жавобгар бўлмайди.

10. Банк чекланмаган муддатга таъсис этилган. Ушбу Уставда Банкнинг кундалик ҳужалик фаолияти деганда Ўзбекистон Республикаси “Банклар ва банк фаолияти тўғрисида”ги Қонунинг 4-моддасида кўрсатиб ўтилган банк операциялари тушунилади.

11. Банк ўзининг номи Ўзбекистон Республикасининг давлат тилида тўлиқ ёзилган ҳамда жойлашган ери кўрсатилган юмалоқ муҳрга эга. Муҳрда бир вақтнинг ўзида банкнинг номи бошқа исталган тилда ҳам кўрсатилиши мумкин.

Банк ўзининг номи ёзилган штамп ва бланкаларга, ўз тимсолига, шунингдек белгиланган тартибда рўйхатдан ўтказилган товар белгисига ҳамда фуқаролик муомаласи иштирокчиларининг, товарларнинг, ишларнинг ва хизматларнинг хусусий аломатларини акс эттирувчи бошқа воситаларга эга бўлишга ҳақли.

Банкнинг жойлашган ери давлат рўйхатидан ўтказилган жойдан бошқа жойга кўра белгиланиши мумкин.

Банкнинг юридик ва почта манзиллари: 100021, Ўзбекистон Республикаси, Тошкент шаҳри, Фурқат кўчаси, 2 уй.

Банкнинг электрон почта манзили: [info@ravnaqbank.uz](mailto:info@ravnaqbank.uz)

Банкнинг расмий веб-сайти: [www.ravnaqbank.uz](http://www.ravnaqbank.uz)

## **II. БАНК ОПЕРАЦИЯЛАРИ**

12. Банк ўз фаолиятида қуйидаги банк операцияларини амалга оширади:  
жисмоний ва юридик шахсларнинг, шу жумладан, вакил банкларнинг ҳисобварақларини очиш ва юритиш, ҳисобварақлар бўйича ҳисоб-китоб қилиш;  
омонатларни жалб этиш;

кредитларнинг қайтарилиши, фоизлилиги ва муддатлилиги шарти билан ўз маблағлари ва жалб этилган маблағлар ҳисобидан ўз номидан кредитлар бериш;  
мблағ эгаси ёки маблағни тасарруф этувчи билан тузилган шартномага биноан пул маблағларини бошқариш;  
чет эл валютасини нақд пул ва нақд бўлмаган пул шаклларида юридик ҳамда жисмоний шахслардан сотиб олиш ва уларга сотиш;  
пул маблағлари, векселлар, тўлов ва ҳисоб-китоб ҳужжатларини инкассо қилиш;  
учинчи шахслар номидан мажбуриятларнинг бажарилишини назарда тутувчи кафолатлар бериш;  
учинчи шахслардан мажбуриятларнинг бажарилишини талаб қилиш ҳуқуқини олиш;  
қимматли қоғозлар чиқариш, харид қилиш, сотиш, ҳисобини юритиш ва уларни сақлаш, мижоз билан тузилган шартномага биноан қимматли қоғозларни бошқариш, қимматли қоғозлар билан бошқа операцияларни бажариш;  
банк фаолияти юзасидан маслаҳат ва ахборот хизмати кўрсатиш;  
жисмоний ва юридик шахсларга ҳужжатлар ва бошқа бойликларни сақлаш учун махсус бинолар ёки улар ичидаги пўлат сандиқларни ижарага бериш;  
молиявий лизинг;  
халқаро банк амалиётига мувофиқ, лицензияда махсус кўрсатилган бошқа операциялар;  
ва бошқа қонунчилик билан тақиқланмаган фаолият билан шугалланиш.

13. Банк бевосита ишлаб чиқариш, савдо ва суғурта фаолияти билан шуғулланишга ҳақли эмас, қонун ҳужжатларида назарда тутилган ҳоллар бундан мустасно.

14. Банк ўз фаолиятини Марказий банк томонидан бериладиган лицензия асосида амалга оширади.

15. Банк аҳоли, корхоналар, ташкилотлар, кредит ва молия институтлари шу жумладан норезидентларнинг бўш турган пул маблағлағларини жалб қилади ва уларни талаб қилиб олгунча сақланадиган депозит ҳисобварақларида, омонат, муддатли депозит ҳисобварақларида, шунингдек бошқа турдаги депозит ҳисобварақлари ва мажбурият ҳисобварақларида сақлайди.

16. Банк корхоналар, бирлашмалар, ташкилотлар, муассасалар ва фуқароларга кредитнинг муддатлилиги, қайтаришлиги, таъминланганлик, мақсадлилиги ва фоизлилиги принциплари асосида сўмда ёки чет эл валютасида кредитлашни амалга оширади.

Банк томонидан бериладиган кредитлар, қоида тариқасида, амалдаги қонун ҳужжатларига мувофиқ ундириш мумкин бўлган мол-мулк гарови, шунингдек кафолатлар, кафилликлар, банк тажрибасида қабул қилинган бошқа шакллардаги мажбуриятлар билан таъминланади. Банк бу кафолатлар, кафилликлар, мажбуриятларнинг етарлилигини ўз кредит сиёсати ҳамда Марказий банк қоида ва тавсияларини ҳисобга олган ҳолда белгилайди.

17. Марказий банк томонидан берилган банк операцияларини амалга ошириш учун лицензия мавжуд бўлганида, Банк мазкур лицензия асосида Марказий банк томонидан белгиланган қоидаларга мувофиқ чет эл валютасида операцияларни амалга оширишга ҳақлидир.

18. Банк Ўзбекистон Республикасининг қонун ҳужжатларида назарда тутилган тартибда қимматли қоғозлар бозорида профессионал фаолиятни амалга ошириши мумкин.

### III. БАНКНИНГ УСТАВ КАПИТАЛИ

19. Банкнинг устав капитали акциядорлар сотиб олган банк акцияларининг номинал қийматидан ташкил топади ва Ўзбекистон Республикасининг миллий валютасида ифодаланади. Банк томонидан чиқариладиган акцияларнинг номинал қиймати бир хил бўлиши керак.

Банкнинг устав капитали банк мол-мулкининг Банк кредиторлари манфаатларини кафолатлайдиган энг кам миқдорини белгилайди.

20. Банк ҳужжатсиз шаклда оддий акцияларни чиқаради ва жойлаштиради.

Банкнинг акциялари эгаси ёзилган, эмиссион қимматли қоғозлардир. Банкнинг барча акцияларининг номинал қиймати 1 000 (бир минг) сўмни ташкил этади.

Акция бўлинмасдир. Агар акция умумий мулк ҳуқуқи асосида бир нечта шахсга тегишли бўлса, бу шахсларнинг барчаси бир акциядор деб эътироф этилади ва акция билан тасдиқланган ҳуқуқлардан ўзларининг умумий вакили орқали фойдаланади.

Бир турдаги акция унга эгалик қилувчи ҳар бир акциядорга шу турдаги акцияларнинг бошқа эгалари билан бир хил бўлган ҳажмдаги ҳуқуқларни беради.

21. Банкнинг устав капитали 100 000 000 000 (юз миллиард ) сўмни ташкил этади ва куйидаги акцияларга тақсимланади:

оддий эгаси ёзилган акциялар – номинал қиймати 1 000 (бир минг) сўм бўлган 100 000 000 (юз миллион) дона миқдорда.

22. Банк томонидан устав капиталини кўпайтириш мақсадида чиқариладиган эълон қилинган қўшимча акцияларнинг суммаси 50 000 000 000 (эллик миллиард ) сўмни ташкил этади, шу жумладан:

оддий эгаси ёзилган акциялар – номинал қиймати 1 000 (бир минг) сўм бўлган 50 000 000 (эллик миллион ) дона миқдорда.

23. Банк акцияларини жойлаштиришда уларнинг ҳақини тўлаш фақат пул маблағлари билангина амалга оширилади.

24. Банкнинг устав капитали қўшимча акцияларни жойлаштириш йўли билан кўпайтирилиши мумкин.

25. Банк устав капиталини қўшимча акцияларни жойлаштириш йўли билан кўпайтириш тўғрисидаги ва Банк уставига тегишли ўзгартишлар киритиш ҳақидаги қарорлар Банк Кенгаши томонидан қабул қилинади.

Қўшимча акциялар Банк томонидан Банк уставига белгиланган эълон қилинган акциялар сони доирасидагина жойлаштирилиши мумкин.

Қўшимча акцияларни жойлаштириш йўли билан Банк устав капиталини кўпайтириш тўғрисидаги қарорда жойлаштириладиган қўшимча оддий (одатдаги) акцияларнинг сони, уларни жойлаштириш муддати ва шартлари белгиланган бўлиши лозим.

Банк устав капиталини қўшимча акциялар жойлаштириш йўли билан кўпайтириш жойлаштирилган қўшимча акцияларнинг номинал қиймати миқдорида қайд этилади. Бунда банк уставига кўрсатилган эълон қилинган муайян турдаги акцияларнинг сони ушбу турдаги жойлаштирилган қўшимча акцияларнинг сонига қисқартирилади.

26. Банкнинг устав капиталини қўшимча акцияларни жойлаштириш йўли билан кўпайтириш жалб қилинган инвестициялар, Банкнинг ўз капитали ва ҳисобланган дивидендлар ҳисобидан амалга оширилиши мумкин.

Банкнинг устав капиталини унинг ўз капитали ҳисобидан қўшимча акцияларни жойлаштириш йўли билан кўпайтиришда бу акциялар барча акциядорлар ўртасида тақсимланади. Бунда ҳар бир акциядорга қайси турдаги акциялар тегишли бўлса, айти ўша турдаги акциялар унга тегишли акциялар сонига муносиб равишда тақсимланади. Банкнинг устав капитали кўпайтирилиши натижасида кўпайтириш суммасининг битта акциянинг номинал қийматига мувофиқлиги таъминланмайдиган бўлса, банкнинг устав капиталини кўпайтиришга йўл қўйилмайди.

27. Банкнинг устав капитали акцияларнинг номинал қийматини ёки уларнинг умумий сонини қисқартириш йўли билан, шу жумладан, акцияларнинг бир қисмини Банкнинг ўзи кейинчалик муомаладан чиқариш (бекор қилиш) шарти билан сотиб олиши йўли билан камайтирилиши мумкин.

Устав капиталини камайтириш ҳамда Банк уставига тегишли ўзгартиришлар киритиш тўғрисидаги қарор Акциядорлар умумий йиғилиши томонидан қабул қилинади. Устав капиталини камайтириш тўғрисида қарор қабул қилган вақтда Акциядорларнинг умумий йиғилиши капитални камайтириш сабабларини кўрсатади ва уни камайтириш тартибини белгилайди.

28. Банк акцияларни очик ва ёпиқ обуна воситасида чиқариш ҳамда жойлаштиришга ҳақлидир.

Жойлаштирилаётган акцияларнинг сони акцияларни чиқариш тўғрисидаги қарорда кўрсатилган миқдордан кўп бўлмаслиги лозим.

Банк томонидан Банкнинг қўшимча акцияларини ва бошқа эмиссиявий қимматли қоғозларини жойлаштириш муддати уларнинг чиқарилиши давлат рўйхатидан ўтказилган пайтдан эътиборан бир йилдан ошмаслиги керак.

Банк Уставида ёки Акциядорлар умумий йиғилишининг қарорида банк акцияларини жойлаштириш услуги тўғрисида кўрсатма бўлмаса, жойлаштириш фақатгина очик обуна воситасида амалга оширилиши мумкин.

29. Банк фонд биржасининг расмий веб-сайтида жамият уставининг матнини, шу жумладан, унга доир ўзгартиш ва қўшимчаларни, шунингдек ошкор этилиши мажбурий бўлган бошқа ахборотни қонун ҳужжатларида белгиланган тартибда эълон қилади.

#### **IV. БАНКНИНГ ҲУҚУҚ ВА МАЖБУРИЯТЛАРИ**

30. Банк операцияларини юритиш билан боғлиқ қарорларни қабул қилишда банк мустақилдир.

31. Банк қуйидаги ҳуқуқларга эга:

омонатлар ва бериладиган кредитлар бўйича фоиз ставкаларини мустақил белгилаш;  
шартнома асосида депозит ва кредитлар шаклида бошқа банкларнинг маблағларини жалб қилиш ҳамда маблағларни бошқа банкларда жойлаштириш;

ташқил этиладиган ҳисоб-китоб маркази ва вакиллик ҳисобварақлари орқали ҳисоб-китобларни амалга ошириш;

банк операциялари бўйича воситачилик тўловлари миқдорини мустақил белгилаш;

барча солиқ ва мажбурий тўловларни тўлаганидан кейин тасарруфида қоладиган соф фойда ҳисобидан захиралар ва фондларни ташқил қилиш;

лицензияда ва Банк уставида назарда тутилган, ўз молия-хўжалик фаолиятини амалга ошириш учун зарур бўлган бошқа хатти-ҳаракатлар ва операцияларни амалга ошириш.

32. Банк қуйидагиларга мажбур:

маблағларни Марказий банкда захирага қўйиш ва белгиланган иқтисодий нормативларга риоя қилиш бўйича Марказий банк томонидан белгиланган талабларни бажариш;

кредит ва лизинг операциялари бўйича эҳтимолий зарарларни қоплаш учун Марказий банк томонидан белгиланган тартиб ва миқдорларда захиралар ташкил этиш;

Марказий банк топшириғига мувофиқ Ўзбекистон Республикаси давлат бюджетининг касса ижроси бўйича операцияларни амалга ошириш;

гаров (шу жумладан мол-мулк шаклидаги), бериладиган кафолатлар, кафилликлар ва мажбуриятларнинг етарлигини ҳисобга олган ҳолда бериладиган кредитлар таъминланишининг локал тартибини белгилаш;

ўз фаолияти тўғрисидаги ахборотни қонун ҳужжатларида белгиланган тартибда ошкор этиш;

Банкда ички аудит хизмати мавжуд бўлишини таъминлаш;

ўз мижоз ва вакилларининг операциялар, ҳисобварақлари ҳамда омонатлари бўйича махфийликни таъминлаш.

33. Банк ўз мижози ва вакилларининг операциялари, ҳисобварақлари ҳамда омонатлари бўйича сирини кафолатлайди. Банк сирини ташкил этувчи маълумотлар мижознинг (вакилнинг) ўзига, мижоз томонидан ваколат берилган вакилга ва қонун ҳужжатларида белгиланган тартибда бошқа шахсларга берилади.

## **V. БАНК АКЦИЯДОРЛАРИ**

34. Оддий акциялар овоз берувчи бўлиб, уларнинг эгасига дивидендлар олиш, Акциядорларнинг умумий йиғилишларида ва Банкни бошқаришда иштирок этиш ҳуқуқини беради.

35. Акцияларга бўлган ҳуқуқлар акцияларни олувчига унинг депо ҳисобварағига тегишли кирим ёзуви белгиланган тартибда киритилган пайтдан эътиборан ўтади ва қонун ҳужжатларида белгиланган тартибда депозитарий томонидан бериладиган депо ҳисобварағидан кўчирма билан тасдиқланади.

Акция билан тасдиқланадиган ҳуқуқлар уларнинг олувчисига ушбу қимматли қоғозга бўлган ҳуқуқлар ўтган пайтдан эътиборан ўтади.

36. Акциядорларнинг ҳуқуқлари.

Акциядорлар:

Банкнинг акциядорлари реестрига киритилиш;

депо ҳисобварағидан ўзига тааллуқли кўчирма олиш;

Банк фойдасининг бир қисмини дивидендлар тарзида олиш;

Банк тугатилган тақдирда ўзига тегишли улушга мувофиқ мол-мулкнинг бир қисмини олиш;

Банк томонидан кўрсатиладиган хизматлар ва уларнинг нархлари тўғрисида маълумотлар олиш;

Банкни бошқаришда иштирок этиш, шу жумладан Акциядорлар умумий йиғилишида ўзи ёки вакиллари орқали иштирок этиш ва овоз бериш, Банкнинг сайланадиган лавозимларига сайлаш ва сайланиш;

Банк уставига мувофиқ банкнинг молиявий-хўжалик фаолияти натижалари тўғрисида тўлиқ ва тўғри ахборот олиш, банк сирини ҳисобланган маълумотлар бундан мустасно;

олган дивидендини эркин тасарруф этиш;

қонун ҳужжатларида белгиланган тартибда банкдан унга тегишли бўлган акцияларнинг ҳаммаси ёки бир қисмини сотиб олишини талаб қилиш;

қимматли қоғозлар бозорини тартибга солиш юзасидан ваколатли давлат органида, шунингдек судда ўз ҳуқуқларини ҳимоя қилиш;

ўзига етказилган зарарнинг ўрни қопланишини белгиланган тартибда талаб қилиш;

ўз манфаатларини ифодалаш ва ҳимоя қилиш мақсадида уюшмалар ва бошқа жамоат ташкилотларига бирлашиш;

Банк акцияларини сотиб олишда зарар кўриш, шу жумладан бой берилган фойда эҳтимоли билан боғлиқ таваккалчиликларни суғурта қилиш ҳуқуқига эга.

Акциядор (акциядорлар) йирик битимни ёки аффилланган шахс билан тузилган битимни ҳақиқий эмас деб топиш тўғрисидаги даъво аризасини судда кўриб чиқиш чоғида Банкдан ва гувоҳлардан суд томонидан кўриб чиқилаётган ишга тааллуқли бўлиши мумкин бўлган барча ҳужжатларни олишга ҳақли, бундан давлат сирини ёки қонун билан кўрикланадиган бошқа сирни ташкил этувчи ҳужжатлар мустасно;

Акциядор қонун ҳужжатларида ва ушбу Уставда назарда тутилган бошқа ҳуқуқларга ҳам эга бўлади.

### 37. Акциядор қуйидагиларга мажбур:

Амалдаги қонунчилик доирасида Банк устави талабларига риоя қилиш ва Банк бошқаруви органи ўз ваколат доирасида қабул қилинган, акциядорларга тааллуқли бўлган қарорларини бажариш;

унинг акцияларига бўлган ҳуқуқларини ҳисобга олиш бўйича хизмат кўрсатувчи инвестиция воситачини ўзига оид маълумотлардаги ўзгаришлар ҳақида ўз вақтида хабардор қилиш;

Банк фаолияти тўғрисида сир тугиладиган, шу жумладан Банкнинг тижорат сирини ташкил этувчи ахборотни ошкор этмаслик;

Ўзбекистон Республикасининг амалдаги қонун ҳужжатлари ва ушбу Уставда назарда тутилган бошқа мажбуриятларни бажариш.

### 38. Овоз берувчи акцияларнинг эгалари бўлган акциядорлар:

Банкни қайта ташкил этиш тўғрисида;

жойлаштирилган акцияларни йириклаштириш ҳақида;

Банк томонидан мол-мулкни олиш ёки бошқа шахсга бериш билан боғлиқ йирик битим тузиш тўғрисида;

Банкнинг акциялар эгалари бўлган акциядорларнинг ҳуқуқларини чекловчи ўзгартиш ва қўшимчалар киритиш ёки янги таҳрирдаги уставни тасдиқлаш тўғрисида Акциядорларнинг умумий йиғилиши томонидан қарорлар қабул қилишда, агар улар қарши овоз берган бўлса ёхуд овоз беришда узрли сабабларга кўра иштирок этмаган бўлса, ўзларига тегишли акцияларнинг ҳаммаси ёки бир қисми жамият томонидан қайтариб сотиб олинишини талаб қилишга ҳақлидир.

Банк акцияларининг 50 ва ундан ортиқ фоизи эгасига айланган шахс, агар у бунгача мазкур Банк акцияларига эгалик қилмаган ёки акцияларининг 50 фоизидан камроғига эгалик қилган бўлса, қолган акциялар эгаларига акцияларни бозор қиймати бўйича ўзига сотишлари борасидаги таклифини ўттиз кун ичида эълон қилиши шарт. Акциядорнинг ўзига тегишли акцияларни сотиши тўғрисидаги ёзма розилиги эълон қилинган кундан эътиборан ўттиз кун ичида олинган тақдирда, Банкнинг 50 ва ундан ортиқ фоиз акциялари эгаси мазкур акцияларни сотиб олиши шарт.

## **VI. БАНКНИНГ СОФ ФОЙДАСИНИ ТАҚСИМЛАШ. ДИВИДЕНДЛАР**

39. Солиқлар ва бошқа мажбурий тўловлар тўлангандан кейин, Банк тасарруфида қоладиган фойда, ушбу Уставга мувофиқ Акциядорларнинг умумий йиғилиши қарорига

кўра қайта инвестициялашни амалга ошириш, амалдаги қонун ҳужжатлари ва ушбу Уставга мувофиқ захира фондларини ташкил қилиш ва акциялар бўйича дивидендлар тўлашга йўналтирилади.

40. Дивиденд Банк соф фойдасининг акциядорлар ўртасида тақсимланадиган қисмидир.

Банк томонидан оддий акциялар бўйича ҳисобланган дивидендларни тўлаш акциядорларнинг дивидендларни олишга бўлган тенг ҳуқуқларига риоя этилган ҳолда амалга оширилади.

Дивидендлар Банкнинг жамият тасарруфида қоладиган соф фойдасидан ва (ёки) ўтган йилларнинг тақсимланмаган фойдасидан тўланади.

Дивиденд акциядорларнинг Умумий йиғилиши қарорига кўра пул маблағлари ёки бошқа қонуний тўлов воситалари ёхуд Банкнинг қимматли қоғозлари билан тўланиши мумкин.

Дивиденд акциядорлар ўртасида уларга тегишли акцияларнинг сони ва турига мутаносиб равишда тақсимланади.

41. Банк:

Банк устав капиталининг ҳаммаси унинг таъсис этилиши чоғида тўлиқ тўлаб бўлингунига қадар;

агар дивидендлар тўланадиган пайтда Банкда банкротлик белгилари мавжуд бўлса ёки Банкда шундай белгилар дивидендларни тўлаш натижасида пайдо бўлса;

агар Банк соф активларининг қиймати унинг устав капитали ва захира фонди суммасидан кам бўлса, акциялар бўйича дивидендлар тўлаш тўғрисида қарор қабул қилишга ҳамда дивидендлар тўлашга ҳақли эмас.

Ушбу бандда кўрсатилган ҳолатлар тугатилгач, Банк ҳисобланган дивидендларни акциядорларга тўлаши шарт.

42. Банк молиявий йилнинг биринчи чораги, ярим йиллиги, тўққиз ойи натижаларига кўра ва (ёки) молиявий йил натижаларига кўра жойлаштирилган акциялар бўйича дивидендлар тўлаш тўғрисида қарор қабул қилишга ҳақли.

Банкнинг молиявий йилнинг биринчи чораги, ярим йиллиги ва тўққиз ойи натижаларига кўра дивидендлар тўлаш тўғрисидаги қарори тегишли давр тугагандан кейин уч ой ичида қабул қилиниши мумкин.

Акциялар бўйича дивидендлар тўлаш, дивиденднинг миқдори, уни тўлаш шакли ва тартиби тўғрисидаги қарор Банк Кенгашининг тавсияси, молиявий ҳисоботнинг ишончлилиги ҳақида аудиторлик хулосаси мавжуд бўлган тақдирда, молиявий ҳисобот маълумотлари асосида Акциядорларнинг умумий йиғилиши томонидан қабул қилинади. Дивидендларнинг миқдори Банк Кенгаши томонидан тавсия этилган миқдордан кўп бўлиши мумкин эмас.

43. Банк акцияларнинг ҳар бир тури бўйича эълон қилинган дивидендларни тўлаши шарт. Дивиденд акциядорлар ўртасида уларга тегишли акцияларнинг сони ва турига мутаносиб равишда тақсимланади.

Дивидендларни тўлаш тўғрисидаги қарорда дивидендларни тўлаш бошланадиган ва тугайдиган саналар кўрсатилган бўлиши лозим.

Дивидендларни тўлаш муддати шундай қарор қабул қилинган кундан эътиборан 60 кундан кеч бўлмаслиги лозим.

44. Дивидендларни тўлаш тўғрисидаги қарор қабул қилинган Акциядорларнинг умумий йиғилишини ўтказиш учун шакллантирилган Банк акциядорлари реестрида қайд этилган акциядорлар дивиденд олиш ҳуқуқига эга.

Банк акциядорларининг реестри Акциядорлар умумий йиғилишини ўтказиш расмий эълон қилинган санадан 3 иш кун олдин шакллантирилади.

45. Банк дивидендларнинг миқдорини улардан ундириладиган солиқларни инобатга олмаган ҳолда эълон қилади.

Банк тўланадиган дивидендлар миқдори тўғрисидаги маълумотларни қимматли қоғозлар бозорини тартибга солиш бўйича ваколатли давлат органининг ва Банкнинг расмий веб-сайтларида қонун ҳужжатларида белгиланган муддатларда эълон қилади.

Дивидендларга солиқ солиш солиқ тўғрисидаги қонун ҳужжатларига мувофиқ амалга оширилади ва бунда солиқ солиш бўйича имтиёзлар белгиланиши мумкин.

46. Банк Ўзбекистон Республикаси қонун ҳужжатларига мувофиқ захира фондини тузади ва ундан фойдаланади. Банкнинг захира фонди устав капиталининг 15 фоизи миқдоридан ташкил этилади. Банкнинг ҳисобот даврида ҳар йилги ажратмаларнинг миқдори соф фойданинг беш фоизидан кам бўлмаслиги керак.

47. Бошқа маблағлар мавжуд бўлмаган тақдирда, Банкнинг захира фонди Банкнинг зарарлари ўрнини қоплаш, Банкнинг корпоратив облигацияларини муомаладан чиқариш ва Банкнинг акцияларини қайтариб сотиб олиш учун мўлжалланади.

Захира фондидан бошқа мақсадларда фойдаланиш мумкин эмас.

48. Акциядорлар умумий йиғилиши қарори бўйича бошқа фондлар тузилиши мумкин. Банк фондлари маблағларидан фойдаланиш, Акциядорлар умумий йиғилиши томонидан тасдиқланган тегишли фондлар тўғрисидаги низомларга мувофиқ Банк Кенгаши қарори бўйича амалга оширилади.

## **VII. БАНКНИ БОШҚАРИШ**

49. Қуйидагилар банкнинг Бошқарув органлари ҳисобланади:

Акциядорлар умумий йиғилиши;

Банк Кенгаши;

Банк Бошқаруви.

Банк Кенгаши ва Банк Бошқаруви Банк устави, Акциядорлар умумий йиғилиши қарорлари ва Ўзбекистон Республикасининг амалдаги қонун ҳужжатларида берилган ваколатлар доирасида банк фаолиятига раҳбарлик қилади.

### **Акциядорлар умумий йиғилиши**

50. Акциядорларнинг умумий йиғилиши Банкнинг юқори бошқарув органидир.

51. Акциядорлар умумий йиғилишининг ваколат доирасига қуйидагилар кирди:

а) Банк уставига ўзгартириш ва қўшимчалар киритиш ёки янги таҳрирдаги Банк устави тасдиқлаш;

б) Банкни қайта ташкил этиш;

в) Банкни тугатиш, тугатувчини тайинлаш, оралик ва якуний тугатиш балансларини тасдиқлаш;

г) Банк Кенгаши ва Миноритар акциядорлар қўмитасининг сон таркибини белгилаш, унинг аъзоларини сайлаш ва уларнинг ваколатларини муддатидан илгари тўхтатиш;

д) эълон қилинган акцияларнинг энг кўп миқдорини белгилаш;

е) Банк устав капиталини камайтириш;

ё) ўз акцияларини қайтариб сотиб олиш;

ж) Банк таркибий тузилмасини тасдиқлаш;

- з) Банк Кенгаши томонидан тайинланган Банк Бошқаруви Раисини тасдиқлаш;
  - и) Банк тафтиш комиссияси аъзоларини (тафтишчини) сайлаш ва уларнинг ваколатларини муддатидан олдин тўхтатиш;
  - й) Акциядорлар умумий йиғилиши, Банк Кенгаши, Банк Бошқаруви ва Банк тафтиш комиссияси тўғрисидаги низомларни тасдиқлаш;
  - к) Банкнинг фойда ва зарарларини тақсимлаш;
  - л) Банкнинг йиллик ҳисоботлари, бухгалтерия баланслари, фойда ва зарарлар ҳисобварағини тасдиқлаш;
  - м) Банк Кенгашининг ва Тафтиш комиссиясининг ўз ваколат доирасига кирадиган масалалар юзасидан, шу жумладан Банкни бошқаришга доир қонун ҳужжатларида белгиланган талабларга риоя этилиши юзасидан Банк Кенгашининг ҳисоботларини ва Тафтиш комиссиясининг хулосаларини эшитиш;
  - н) Ўзбекистон Республикаси қонун ҳужжатларида назарда тутилган ҳолларда акциядорларнинг акцияларни ва овоз берувчи акцияларга айирбошланадиган қимматли қоғозларни имтиёзли сотиб олиш ҳуқуқини қўлламаслик тўғрисида қарор қабул қилиш;
  - о) Акциядорлар умумий йиғилиши регламентини тасдиқлаш;
  - п) акцияларни майдалаш ва йириклаштириш;
  - р) Ўзбекистон Республикаси қонун ҳужжатларида назарда тутилган тартиб ва ҳолларда аффилиланган шахс билан тузилиши мумкин бўлган битимни (битимларни) маъқуллаш ҳақида қарор қабул қилиш;
  - с) баланс қиймати ёки олиш қиймати битим тузиш тўғрисида қарор қабул қилинаётган санада банк соф активлари миқдорининг эллик фоизидан ортиғини ташкил этувчи мол-мулкни Банкнинг олиши ёки тасарруфидан чиқариши билан боғлиқ йирик битимларни тузиш тўғрисидаги қарор қабул қилиш, Банкнинг кундалик хўжалик фаолиятини юритиш асосида содир этиладиган битимлар бундан мустасно;
  - т) фондларни тузилиш ҳақида қарорларни қабул қилиш;
  - у) Ўзбекистон Республикаси қонун ҳужжатлари ва Банк уставида кўрсатилган бошқа масалаларни ҳал этиш;
  - ф) Банк фаолиятининг асосий йуналишлари ва мақсадидан келиб чиққан ҳолда Банкни ўрта муддатга ва узоқ муддатга ривожлантиришнинг аниқ муддатлари белгиланган стратегиясини тасдиқлаш;
  - х) мажбурий аудиторлик текширувини ўтказиш учун аудиторлик ташкилотини белгилаш, ушбу ташкилотнинг хизматларига тўланадиган энг қўп ҳақ миқдори ва у билан шартнома тузиш (шартномани бекор қилиш) тўғрисида қарор қабул қилиш.
- Акциядорлар умумий йиғилишининг ваколат доирасига киритилган масалалар Банк Кенгаши ҳал этиши учун берилиши мумкин эмас, қуйидагилар бундан мустасно:
- Банкнинг устав капиталини кўпайтириш, шунингдек Банк уставига Банкнинг устав капиталини кўпайтириш билан боғлиқ ўзгартиш ва қўшимчалар киритиш;
  - акцияларни жойлаштириш (қимматли қоғозларнинг биржа бозорига ва уюшган биржадан ташқари бозорига чиқариш) нархини белгилаш;
  - Банк томонидан корпоратив облигациялар, шу жумладан акцияларга айирбошланадиган облигациялар чиқариш тўғрисида қарор қабул қилиш;
  - қимматли қоғозларнинг ҳосилаларини чиқариш тўғрисида қарор қабул қилиш;
  - Банкнинг корпоратив облигацияларини қайтариб сотиб олиш тўғрисида қарор қабул қилиш;
  - Банк Бошқарув аъзоларини лавозимига тайинлаш ва ваколатларини муддатидан илгари тугатиш;
  - Банк Бошқарувида тўланадиган ҳақ ва компенсациялар миқдорларини белгилаш;
  - Банкнинг йиллик бизнес-режасини тасдиқлаш.

52. Овозга қўйилган масалалар бўйича Акциядорлар умумий йиғилишининг қарори Акциядорлар умумий йиғилишида иштирок этаётган овоз берувчи акцияларнинг эгалари бўлмиш акциядорларнинг кўпчилик овози билан қабул қилинади.

Банк уставининг 51-банди а), б), в), д), м) р), с) кичик бандларида ва Ўзбекистон Республикаси амалдаги қонунчилигида кўрсатилган масалалар бўйича қарорлар Акциядорлар умумий йиғилиши томонидан Акциядорлар умумий йиғилишида иштирок этаётган овоз берувчи акцияларнинг эгалари бўлмиш акциядорларнинг тўртдан уч қисмидан иборат кўпчилик овози билан қабул қилинади.

Солиққа оид ёки давлат олдидаги бошқа қарздорлик ҳисобига Банк устав капиталдаги давлат улушини шакллантириш ёки ошириш тўғрисидаги қарор Банк Акциядорлари умумий йиғилиши томонидан Банкнинг жойлаштирилган овоз берувчи акцияларининг камида учдан икки қисми эгалари бўлган акциядорларнинг (давлатдан ташқари) розилиги мавжуд бўлган тақдирда, акциядорларнинг оддий кўпчилик овози билан қабул қилинади

53. Акциядорлар умумий йиғилиши кун тартибига киритилмаган масалалар бўйича қарор қабул қилишга, шунингдек кун тартибига ўзгартиришлар киритишга ҳақли эмас.

54. Банк Акциядорлар умумий йиғилишини ҳар йили ўтказиши шарт. Акциядорлар умумий ҳисобот йиғилиши ҳар йили молия йили тугагандан кейин кўпи билан 6 (олти) ой ичида ўтказилади.

55. Акциядорлар умумий йиғилишида қатнашиш ҳуқуқига расмий эълон қилинган Акциядорлар умумий йиғилишини ўтказиш санасидан 3 иш кун олдин шакллантириладиган Банк акциядорларининг реестрида қайд этилган акциядорлар эга.

56. Акциядорларнинг умумий йиғилишини ўтказиш тўғрисидаги хабар акциядорларнинг умумий йиғилиши ўтказиладиган санадан камида йигирма бир кундан кечиктирмай, лекин узоғи билан ўттиз кун олдин Корпоратив ахборотнинг ягона порталида, Банкнинг расмий веб-сайтида ва оммавий ахборот воситаларида эълон қилинади, шунингдек акциядорларга электрон почта орқали юборилади.

57. Акциядорлар умумий йиғилишини ўтказишга тайёргарлик кўришда акциядорларга тақдим этилиши лозим бўлган ахборотлар (материаллар)га Банкнинг йиллик ҳисоботи, Банкнинг йиллик молиявий-хўжалик фаолиятини текшириш натижалари бўйича Банк тафтиш комиссияси ва аудиторлик ташкилотининг хулосаси, Банк Бошқаруви Раиси билан тузилган шартнома муддатини узайтириш, қайта тузиш ёки шартномани бекор қилиш мумкинлиги тўғрисида Банк Кенгаши хулосаси, Банк Кенгаши ва Банк тафтиш комиссияси аъзоллигига номзодлар тўғрисидаги маълумотлар, Банк уставига киритиладиган ўзгартириш ва қўшимчалар лойиҳаси ёки янги таҳрирдаги Банк устави лойиҳаси киради.

58. Банк овоз берувчи акцияларининг ҳаммаси бўлиб камида бир фоизига эгалик қилувчи акциядорлар (акциядори) банкнинг молия йили тугагандан кейин ўттиз кундан кечиктирмай, Акциядорларнинг йиллик умумий йиғилиши кун тартибига масалалар киритишга ҳамда Банк Кенгаши ва Банк тафтиш комиссиясига бу органнинг миқдор таркибидан ошмайдиган тарзда номзодлар кўрсатишга ҳақли.

Акциядорлар (акциядор) Банк Кенгаши ва Тафтиш комиссиясига ўзлари кўрсатган номзодлар рўйхатига Акциядорларнинг йиллик умумий йиғилиши ўтказилиши тўғрисидаги хабар эълон қилинган санадан эътиборан 3 иш кундан кечиктирмай ўзгартиришлар киритишга ҳақли.

Акциядорлар умумий йиғилишининг кун тартибига масала уни қўйиш сабаблари, масалани киритаётган акциядорларнинг (акциядорнинг) исми-шарифи (номи), уларга тегишли акцияларнинг сони ва тури кўрсатилган ҳолда ёзма шаклда киритилади.

Банк Кенгаши ва Банк тафтиш комиссиясига номзодлар кўрсатиш, шу жумладан ўзининг номзодини кўрсатиш тўғрисида таклиф киритилганда номзоднинг исми, башарти номзод Банк акциядори бўлса, унга тегишли акцияларнинг сони ва тури, шунингдек номзодни кўрсатган акциядорларнинг исми, уларга тегишли акцияларнинг сони ва тури кўрсатилади.

Банк Кенгаши тушган таклифларни кўриб чиқиши ҳамда ушбу модданинг биринчи ва иккинчи қисмларида белгиланган муддат тугаганидан сўнг 10 кундан кечиктирмай уларни Акциядорлар умумий йиғилиши кун тартибига киритиш ёки мазкур кун тартибига киритишни рад этиш ҳақида қарор қабул қилиши шарт. Акциядор (акциядорлар) киритган масала Акциядорлар умумий йиғилишининг кун тартибига, шунингдек кўрсатилган номзодлар Банк Кенгаши ва Банк тафтиш комиссиясига сайлов юзасидан овоз бериш учун номзодлар рўйхатига киритилиши шарт, қуйидаги ҳоллар бундан мустасно:

акциядор (акциядорлар) ушбу банднинг биринчи қисмида белгиланган муддатга риоя этмаган бўлса;

акциядор (акциядорлар) ушбу банднинг биринчи қисмида назарда тутилган миқдордаги банк овоз берувчи акцияларининг эгаси бўлмаса;

ушбу банднинг учинчи қисмида назарда тутилган маълумотлар тўлиқ бўлмаса;

таклифлар ушбу Уставнинг ёки бошқа қонун ҳужжатларининг талабларига мувофиқ бўлмаса.

Банк Кенгашининг масалани Акциядорлар умумий йиғилишининг кун тартибига ёки номзодни Банк Кенгаши ва Банк тафтиш комиссиясига сайлов юзасидан овоз бериш учун номзодлар рўйхатига киритишни рад этиш тўғрисидаги асослантирилган қарори ана шу масалани киритган ёки таклиф тақдим этган акциядорга (акциядорларга) қарор қабул қилинган кундан эътиборан узоғи билан уч иш кунидан кечиктирмай юборилади.

Банк Кенгашининг масалани Акциядорлар умумий йиғилишининг кун тартибига ёки номзодни Банк Кенгаши ва Банк тафтиш комиссиясига сайлов юзасидан овоз бериш учун номзодлар рўйхатига киритишни рад этиш тўғрисидаги қарори устидан судга шикоят қилиш мумкин.

59. Акциядорларнинг навбатдан ташқари умумий йиғилиши Банк Кенгашининг қарорига кўра унинг ўз ташаббуси асосида, Банк Тафтиш комиссиясининг ёзма талаби, шунингдек ёзма талаб тақдим этилган санада Банк овоз берувчи акцияларининг камида беш фоизига эгалик қилувчи акциядорнинг (акциядорларнинг) ёзма талаби асосида ўтказилади.

60. Акциядорлар умумий йиғилишида иштирок этиш ҳуқуқи шахсан акциядор томонидан ёки унинг вакили орқали амалга оширилади. Акциядор Акциядорлар умумий йиғилишидаги ўз вакилини исталган вақтда алмаштиришга ёки йиғилишда шахсан ўзи иштирок этишга ҳақлидир.

61. Акциядорнинг вакили Акциядорлар умумий йиғилишида ёзма ишончнома асосида иш кўради. Овоз беришга доир ишончномада ваколат берган ва вакил қилинган шахслар тўғрисидаги маълумотлар (исми ёки номи, турар жойи ёки жойлашган манзили, паспорт маълумотлари) акс эттирилган бўлиши лозим. Жисмоний шахс номидан берилган овоз беришга доир ишончнома нотариал тасдиқланган бўлиши керак. Юридик шахс номидан бериладиган овоз беришга доир ишончнома қонун ҳужжатларида белгиланган тартибда берилади.

Агар банкнинг акцияси бир нечта шахснинг умумий улушли мулкида бўлса, Акциядорларнинг умумий йиғилишида овоз бериш ваколатлари уларнинг хоҳишига кўра

умумий улушли мулк иштирокчиларидан бири ёки уларнинг умумий вакили томонидан амалга оширилади. Кўрсатиб ўтилган ҳар бир шахснинг ваколатлари тегишли тарзда расмийлаштирилган бўлиши керак.

62. Агар Акциядорлар умумий йиғилишида иштирок этувчиларни рўйхатдан ўтказиш тугалланган пайтда, банкнинг жойлаштирилган овоз берувчи акцияларининг жами эллик фоизидан кўпроқ овозига эга бўлган акциядорлар (уларнинг вакиллари) рўйхатдан ўтган бўлса, Акциядорлар умумий йиғилиши ваколатли (кворумга эга) ҳисобланади.

63. Акциядорлар умумий йиғилишида кун тартиби масалалари бўйича овоз бериш овоз бериш бюллетенлари орқали амалга оширилади.

Овоз бериш бюллетенларининг шакли ва матни Банк Кенгаши томонидан тасдиқланади, акциядорларнинг навбатдан ташқари умумий йиғилиши Банк Кенгаши томонидан қақирилмаган ҳоллар бундан мустасно. Овоз бериш бюллетени умумий йиғилишда иштирок этиш учун рўйхатдан ўтган акциядорга (унинг вакилига) берилади.

64. Банк Кенгаши ёки Банк тафтиш комиссияси аъзосини сайлаш тўғрисидаги масала юзасидан овоз бериш ўтказилган тақдирда, овоз бериш бюллетенида номзод тўғрисидаги маълумот ақс эттирилган бўлиб, унинг фамилияси, исми, отасининг исми кўрсатилиши лозим.

65. Овоз бериш яқунлари бўйича санок комиссияси овоз бериш яқунлари тўғрисида баённома тузади, баённома жумладан Акциядорлар умумий йиғилишининг кворуми мавжудлиги тўғрисидаги маълумотларни ҳам ўз ичига олади ва санок комиссиясининг аъзолари томонидан имзоланади.

66. Акциядорлар умумий йиғилишининг баённомаси Акциядорлар умумий йиғилиши ёпилганидан кейин ўн кундан кечиктирмай икки нусхада тузилади. Ҳар иккала нусха ҳам Акциядорлар умумий йиғилишида Раислик қилувчи ва Акциядорлар умумий йиғилиши котиби томонидан имзоланади.

### **Банк Кенгаши**

67. Банк Кенгаши банк фаолиятига умумий раҳбарликни амалга оширади, Ўзбекистон Республикасининг қонун ҳужжатлари ва ушбу Устав билан Акциядорлар умумий йиғилишининг ваколат доирасига киритилган масалаларни ҳал этиш бундан мустасно.

68. Банк Кенгаши ваколат доирасига қуйидагилар қиради:

а) Банк фаолиятининг устувор йўналишларини белгилаш, Банкни ривожлантириш стратегиясига эришиш бўйича кўрилаётган чора-тадбирлар тўғрисида Банк Бошқарувининг ҳисоботини мунтазам равишда эшитиб бориш;

б) йиллик ва навбатдан ташқари Акциядорлар умумий йиғилишларини қақирриш, қонун ҳужжатларида ва ушбу Уставда назарда тутилган ҳоллар бундан мустасно;

в) акциядорлар умумий йиғилиш кун тартибини тайёрлаш;

г) Акциядорларнинг умумий йиғилиши ўтказиладиган сана, вақт ва жойни белгилаш;

д) Акциядорларнинг умумий йиғилиши ўтказилиши ҳақида хабар қилиш учун Банк акциядорларининг реестрини шакллантириш санасини белгилаш;

е) эълон қилинган акциялар сони ва тури доирасида Банк томонидан қўшимча акцияларни жойлаштириш орқали Банк устав капиталини кўпайтириш тўғрисида қарор

қабул қилиш ҳамда шу билан боғлиқ бўлган хужжатлар (акциялар чиқарилуви тўғрисидаги қарор ва эмиссия рисоласи)ни тасдиқлаш;

ё) Банкни қайта ташкил қилиш, йиллик ҳисоботи, бухгалтерия баланси, фойда ва зарарлар тўғрисидаги ҳисоботларни, фойда ва зарарлар тақсимланишини тасдиқлаш, Банк уставига ўзгартиришлар ва қўшимчалар киритиш ёки янги таҳрирдаги Банк уставини тасдиқлаш тўғрисида таклифларни кўриб чиқиш учун Акциядорлар умумий йиғилишига киритиш;

ж) Банк уставига унинг устав капиталини кўпайтириш билан боғлиқ ҳамда Банкнинг эълон қилинган акциялари сонини камайтириш билан боғлиқ ўзгартиш ва қўшимчалар киритиш ;

з) Банкнинг аввал рўйхатдан ўтган қимматли қоғозлар чиқарилишига ўзгартиришлар ва (ёки) қўшимчалар киритиш тўғрисида қарор қабул қилиш ҳамда киритилаётган ўзгартиришлар ва (ёки) қўшимчалар матнини тасдиқлаш;

и) аудиторлик текшируви ўтказиш тўғрисида (мажбурий аудиторлик текшируви бундан мустасно), аудиторлик ташкилотини ва унинг хизматига тўланадиган ҳақ миқдори чегарасини белгилаш тўғрисида қарор қабул қилиш;

й) мол-мулкнинг бозор қийматини белгилашни ташкил этиш;

к) йиллик бизнес-режа ва Банк фаолияти йўналишлари бўйича Банк сиёсатларини тасдиқлаш;

л) Марказий банк билан келишган ҳолда Банк Бошқаруви раисини лавозимига тайинлаш ва муддатидан олдин ваколатини тугатиш ва кейинчалик бу масалани Акциядорлар умумий йиғилишига киритиш;

м) Банк Бошқаруви аъзоларини лавозимига тайинлаш ва муддатидан олдин ваколатини тугатиш;

н) ички аудит хизматини ташкил этиш ва унинг ходимларини тайинлаш, шунингдек ҳар чоракда унинг ҳисоботларини эшитиб бориш;

о) Банк Бошқаруви аъзоларига тўланадиган ҳақ ва компенсациялар миқдорини белгилаш;

п) Банк тафтиш комиссияси аъзоларига тўланадиган ҳақ ва компенсация миқдори юзасидан тавсиялар бериш;

р) акциялар бўйича дивидендлар миқдори ва уларни тўлаш шакли ва тартиби юзасидан тавсиялар бериш;

с) Банкнинг захира ва бошқа фондларидан фойдаланиш;

т) Банкнинг таркибий тузилмалари ва филиаллари фаолият тартибини белгиловчи локал хужжатларни тасдиқлаш, Ўзбекистон Республикаси қонун хужжатлари ва ушбу Уставга мувофиқ Акциядорлар умумий йиғилиши ваколатига тааллуқли бўлган локал хужжатларни қабул қилиш (тасдиқлаш) бундан мустасно;

у) Банк ваколатхоналарини очиш ва филиалларини ташкил қилиш;

ф) Банкнинг шўъба ва тобе хўжалик жамиятларини ташкил этиш;

х) Банк қўмиталарини ташкил қилиш ва улар тўғрисидаги низомлар, шунингдек ички аудит ва ички назорат хизмати низомларини тасдиқлаш;

ц) баланс қиймати ёки олиш қиймати битим тузиш тўғрисида қарор қабул қилинаётган санада Банк соф активлари миқдорининг ўн беш фоизидан эллик фоизигачасини ташкил этувчи мол-мулкни банкнинг олиши ёки тасарруфидан чиқариши билан боғлиқ йирик битимларни тузиш, уларни муддатини узайтиришни маъқуллаш, Банк кундалик хўжалик фаолиятини юритиш асосида содир этиладиган битимлар бундан мустасно;

ч) Ўзбекистон Республикаси қонун хужжатларида назарда тутилган тартиб ва ҳолларда аффилиланган шахслар билан тузилиши мумкин бўлган битимни (битимларни) маъқуллаш ҳақида қарор қабул қилиш;

ш) Банкнинг тижорат ва нотижорат ташкилотлардаги иштироки билан боғлиқ битимларни қонун хужжатларида белгиланган тартибда тузиш;

э) Банк билан алоқадор бўлган шахслар билан операцияларни амалга оширишга рухсат бериш;

ю) Банк акцияларни жойлаштириш (қимматли қоғозларнинг биржа бозорига ва уюшган биржадан ташқари бозорига чиқариш) нархини белгилаш;

я) Банк томонидан корпоратив облигациялар, шу жумладан акцияларга айирбошланадиган облигациялар чиқариш тўғрисида қарор қабул қилиш;

ў) Банк томонидан қимматли қоғозларнинг ҳосилаларини чиқариш тўғрисида ва Банкнинг корпоратив облигацияларини қайтариб сотиб олиш тўғрисида қарорларни қабул қилиш;

к) Ўзбекистон Республикасининг қонун ҳужжатлари, ушбу Устав ва Банк Кенгаши тўғрисидаги Низомда назарда тутилган Банк Кенгаши ваколат доирасига киритилган бошқа масалаларни ҳал қилиш.

Банк Кенгаши ваколат доирасига киритилган масалалар Банк Бошқарувида ҳал қилиш учун ўтказилиши мумкин эмас.

69. Банк Кенгаши мажбуриятлари:

ўз ваколатларини Банк акциядорлари манфаатларини кўзлаб амалга ошириш;

Банкка ваколатли раҳбарликни таъминлаш;

Банк Бошқаруви томонидан тайёрланган Банкнинг узоқ ва қисқа муддатли бизнес-режаларини тасдиқлаш ҳамда уларнинг ижросини назорат қилиш;

Банк тезкор фаолияти, кредитлар бериш ва маблағларни инвестициялашнинг тўғрилиги устидан жорий назоратни амалга ошириш (омонатчилар, кредиторлар ва акциядорлар манфаатларини ҳимоя қилиш мақсадида);

Банкнинг етарли даражадаги капиталлашувини қўллаб-қувватлаш;

Банк фаолияти стратегиясини шакллантириш;

Банкнинг фойда кўриши мониторингини олиб бориш;

ички аудит хизмати фаолият кўрсатишини ташкил этиш;

Банк мақсадларига эришиш ҳамда қонуний, хавфсиз ва самарали банк фаолиятини юритиш учун етарли сиёсатларни белгилаш;

ҳар чоракда Банк фаолияти натижалари тўғрисидаги Банк Бошқаруви ва ички аудит хизматининг ҳисоботларни эшитиш;

Банк операциялари учун мос назоратни таъминлаш ва уларни Ўзбекистон Республикаси қонун ҳужжатлари ва Банк сиёсатларига мувофиқлиги устидан назоратни амалга ошириш;

корпоратив бошқариш бўйича қонун ҳужжатлари билан белгиланган талабларга риоя қилиниши тўғрисидаги ҳисоботни йиллик Акциядорлар умумий йиғилишига тақдим этиш.

70. Банк Кенгаши 5 кишидан иборат таркибда сайланади. Банк Кенгаши аъзолари Акциядорлар умумий йиғилишида чекланмаган ҳолда қайта сайланиш ҳуқуқи билан бир йилга сайланади.

Банк Бошқаруви аъзолари ва Бошқарув Раиси, шунингдек Банкда меҳнат шартномаси бўйича ишлаётган шахслар Банк Кенгашига сайланиши мумкин эмас.

71. Банк Кенгаши аъзолари сайлови кумулятив овоз бериш орқали амалга оширилади.

Кумулятив овоз беришда ҳар бир акциядорга тегишли овозлар сони Банк Кенгашига сайланиши лозим бўлган шахслар сонига кўпайтирилади ва акциядор шу тарихда олинган овозларни битта номзодга тўлиқ беришга ёки уларни икки ва ундан ортиқ номзодлар ўртасида тақсимлашга ҳақлидир.

72. Банк Кенгаши Раиси Банк Кенгаши умумий аъзолари сонининг кўпчилик овози билан Банк Кенгаши аъзолари томонидан сайланади.

73. Банк кенгаши таркибига камида бир нафар мустақил аъзо киритилади. Ушбу аъзо ҳар йили қайта сайланиши мумкин.

Қуйидаги шахс Банк кенгашининг мустақил аъзоси деб эътироф этилади:

сўнгги уч йил мобайнида Банкда ва (ёки) унинг аффилиланган шахсларида ишламаган шахс;

Банкнинг акциядори ва (ёки) унинг аффилиланган шахсининг таъсисчиси (акциядори, иштирокчиси) бўлмаган шахс;

Банкнинг ва (ёки) унинг аффилиланган шахсининг йирик мижози ва (ёки) йирик етказиб берувчиси билан фуқаролик-ҳуқуқий муносабатларда бўлмаган шахс. Бунда қайси мижоз ва етказиб берувчи билан энг кам иш ҳақининг икки минг бараваридан кўп бўлган суммага тенг амалдаги шартнома мавжуд бўлса, ўшалар йирик мижоз ва йирик етказиб берувчи деб эътироф этилади;

Банк ва (ёки) унинг аффилиланган шахслари билан бирор-бир келишувга эга бўлмаган шахс, бундан Банк кенгаши аъзосининг вазифалари ва функциялари бажарилишини таъминлаш билан боғлиқ бўлган ҳоллар мустасно;

Банк бошқарув органлар ва ички назорат органларининг ва (ёки) унинг аффилиланган шахсларининг аъзоси бўлган шахснинг ёки сўнгги уч йил ичида уларга аъзо бўлган шахснинг эри (хотини), ота-онаси (фарзандликка олувчиси), фарзанди (фарзандликка олинган боласи), туғишган ва ўғай акаси (укаси) ҳамда опаси (синглиси) бўлмаган шахс;

давлат бошқаруви органининг ёки давлат корхонасининг ходими бўлмаган шахс.74. Банк Кенгаши Раиси Банк Кенгаши ишини ташкил этади, мажлисларини чақиради ва уларда Раислик қилади, Банк Кенгаши мажлисларида баённома юритилишини ташкил этади ҳамда Акциядорларнинг умумий йиғилишида Раислик қилади, банк номидан Бошқарув Раисини ёллаш тўғрисидаги меҳнат шартномасини тузади.

Банк Кенгаши Раиси жойида бўлмаган тақдирда унинг функцияларини Банк Кенгаши аъзоларидан бири амалга оширади.

75. Банк Кенгаши мажлиси Кенгаш Раисининг ўз ташаббусига кўра ёки Банк Кенгашининг аъзоси, Банк тафтиш комиссияси, Банк Бошқаруви, ички аудит хизмати раҳбари, Банк ташқи аудити талабига кўра чақирилади.

76. Банк Кенгаши ҳар ой камида бир марта чақирилади.

77. Банк Кенгаши мажлисини ўтказиш учун кворум Банк Кенгашига сайланган аъзоларнинг 75 фоизидан кам бўлмаслиги керак.

Банк Кенгаши аъзоларининг сони ушбу Уставда назарда тутилган миқдорнинг 75 фоизидан кам бўлиб қолса, Банк Кенгашининг янги таркибини сайлаш учун фавқулодда (навбатдан ташқари) Акциядорлар умумий йиғилишини чақириши шарт. Банк Кенгашининг қолган аъзолари ана шундай фавқулодда (навбатдан ташқари) Акциядорлар умумий йиғилишини чақириш тўғрисидагина қарор қабул қилишга ҳақлидир.

78. Энг муҳим масалаларни кўриб чиқиш ва Банкнинг кенгашига тавсиялар тайёрлаш учун Банк кенгаши аъзолари орасидан кўмиталар ташкил этилиши мумкин.

Банк фақат мазкур Банк кенгашининг аъзоларидан таркиб топган аудит кўмитасини ташкил этиши шарт. Банкнинг ички аудит хизмати ўз фаолиятида аудит кўмитасига ҳисобдордир.

Кўмиталарни шакллантириш ва уларнинг ишлаш тартиби, сони ва таркиби Банк кенгаши тўғрисидаги низомда белгиланади.

79. Банк Кенгашининг мажлисида қарорлар мажлисида иштирок этаётган Банк Кенгаши аъзоларининг кўпчилик овози билан қабул қилинади, агар ушбу Устав ва қонунчиликда бошқача қоида белгиланмаган бўлса.

Банк Кенгаши қарорларини қабул қилишда овозлар тенг бўлган ҳолларда Банк Кенгаши Раиси ҳал қилувчи овоз ҳуқуқига эга.

Банк Кенгаши аъзоси ўз овозини бошқа Банк Кенгаши аъзосига беришга йўл қўйилмайди.

80. Банк Кенгашининг мажлисида баённома юритилади, у мажлис ўтказилганидан сўнг 10 кундан кечиктирмай тузилади ва тасдиқланади.

Банк Кенгаши мажлисининг баённомаси мажлисида иштирок этаётган Банк Кенгаши аъзолари томонидан имзоланади, улар мажлисининг баённомаси тўғрилиги учун жавобгардир.

Банк Кенгашининг қарорлари сиртдан овоз бериш йўли билан (сўров йўли билан) Банк Кенгашининг барча аъзолари томонидан бир овоздан қабул қилиниши мумкин.

Банк Кенгаши мажлисининг баённомаси имзоланган куни Банк Бошқарувига ижро этиш учун топширилади. Банк Кенгаши Акциядорларнинг умумий йиғилишини чақириш тўғрисида қарор қабул қилган тақдирда мазкур қарор ҳақидаги ахборот Банк Бошқарувига Банк Кенгашининг мажлиси ўтказиладиган куни топширилади.

### **Банк Бошқаруви**

81. Банкка оператив раҳбарлик қилувчи ва унинг фаолияти учун жавоб берувчи Банк Бошқаруви банкнинг ижроия органи ҳисобланади.

Банк Бошқаруви Банк Кенгаши ва Акциядорлар умумий йиғилиши олдида ҳисобдордир.

82. Банк Бошқаруви 5 кишидан иборатдир. Банк Бошқаруви таркибига Раис, унинг ўринбосарлари, Банкнинг бош бухгалтери ва юридик хизмат бошлиғи киради. Банк Бошқаруви таркибига шунингдек банкнинг асосий бўлинмалари раҳбарлари кириши мумкин.

83. Банк Бошқарув Раиси ўз лавозимига Марказий банк билан келишилган ҳолда Банк Кенгаши қарори билан бир йил муддатга тайинланади ва кейинчалик Акциядорлар умумий йиғилиши тасдиғига киритилади.

Баншқарув аъзолари Банк Кенгаши томонидан бир йил муддатга тайинланади.

Банк Бошқарувига чет эллик менежерлар ҳам аъзо булиши мумкин.

84. Банк Бошқаруви ваколатига ушбу Устав ва Ўзбекистон Республикаси қонун ҳужжатларига биноан Акциядорлар умумий йиғилиши ва Банк Кенгаши мутлак ваколатларига кирадиган масалалардан ташқари, Банк фаолиятига кундалик раҳбарлик қилиш билан боғлиқ барча масалалар киради.

Банк Бошқаруви Акциядорлар умумий йиғилиши ва Банк Кенгаши қарорларининг бажарилишини ташкил этади.

Банк Бошқаруви:

Банкнинг таркибий тузилмалари ишини мувофиқлаштиради;

ички назорат ва ички аудит хизматлари низомларидан ташқари Банк таркибий бўлинмалари тўғрисидаги низомларни тасдиқлайди;

Банкнинг кундалик фаолиятидаги муҳим масалалар бўйича қарорлар қабул қилади;

Банк ички аудити департаментининг текширув натижалари бўйича аниқланган камчиликлар ва қонун бузилишларни ҳар чоракда кўриб чиқади ва уларни бартараф қилиш чораларини кўради;

ташқи аудит текшируви натижалари ва Марказий банк томонидан ўтказилган инспекция (текширув) ҳисоботларини батафсил таҳлил қилади;

кредит, инвестиция, эмиссия сиёсатлари, Банк ликвидлигини бошқариш сиёсатини қамраб олувчи Банкни бошқариш учун сиёсатлар ишлаб чиқиш чора-тадбирларини кўради;

баланс қиймати ёки олиш қиймати битим тузиш тўғрисида қарор қабул қилинаётган санада Банк соф активлари миқдорининг беш фоизидан ўн беш фоизигача бўлган мол-мулкни Банк олиши ёки тасарруфидан чиқариши билан боғлиқ йирик битимларни тузади;

Ўзбекистон Республикаси қонун ҳужжатлари, ушбу Устав ва Банк Бошқаруви тўғрисидаги Низомга биноан Банк Бошқаруви ваколатига тааллуқли бўлган бошқа масалаларни ҳал қилади.

85. Банк Бошқаруви мажлиси, агар унда Банк Бошқарувининг камида 4 аъзоси ҳозир бўлса, ваколатли ҳисобланади.

Қарорлар Банк Бошқаруви мажлисида иштирок этувчиларнинг кўпчилик овози билан қабул қилинади. Овозлар тенг бўлган ҳолларда Банк Бошқарув Раисининг овози ҳал қилувчи овоз ҳисобланади.

Банк Бошқаруви аъзоси Банк Бошқаруви қарорига қўшилмаган ҳолларда Банк Кенгашига ўз фикри тўғрисида хабар бериши мумкин.

86. Банк Бошқаруви мажлисида баённома юритилади. Банк Бошқаруви мажлисининг баённомаси Банк Кенгаши аъзолари ва Банк тафтиш комиссиясининг талаби бўйича уларга тақдим қилинади.

Банк Бошқаруви мажлисини ўтказилишини, Банк номидан барча ҳужжатларга ва Банк Бошқаруви мажлиси баённомасига имзо чекувчи Банк Бошқаруви Раиси ташкил қилади.

87. Банк Бошқарув Раиси ва аъзоларининг ҳуқуқ ва мажбуриятлари Ўзбекистон Республикаси қонун ҳужжатлари, ушбу Устав, Банк Бошқаруви тўғрисидаги Низом, шунингдек Банк ҳар бир Бошқарув аъзоси билан бир йил муддатга тузадиган, узайтириш (шартномани қайта тузиш) ёки уни тугатиш (бекор қилиш) мумкинлиги тўғрисида ҳар йили қарор қабул қилинадиган шартномаларда белгиланади.

Банк номидан шартномаларга Банк Кенгаши Раиси ёки Банк Кенгаши ваколат берган шахс имзолайди. Банк Бошқаруви Раиси билан тузиладиган шартномада унинг Банк фаолияти самарадорлигини ошириш бўйича мажбуриятлари ҳамда Акциядорларнинг умумий йиғилиши ва Банк Кенгаши олдида Банкнинг йиллик бизнес-режасини бажариш қандай бораётганлиги юзасидан берадиган ҳисоботлари даврийлиги назарда тутилиши лозим.

88. Банк Бошқаруви Раиси шартнома шартларини бузганда Акциядорлар умумий йиғилиши у билан шартномани бекор қилиш ҳуқуқига эга.

Банк Кенгаши Банк Бошқаруви Раиси, аъзолари билан тузилган шартномани, улар Банк уставини қўпол тарзда бузишга йўл қўйган бўлса ёки уларнинг ҳаракатлари (ҳаракатсизлиги) туфайли банкка зарар етказилган бўлса, муддатидан илгари тугатиш (бекор қилиш) ҳуқуқига эга.

89. Акциядорлар умумий йиғилиши томонидан Банк Бошқаруви Раисининг ваколатларини тугатиш тўғрисида қарор қабул қилинган тақдирда, Банк Бошқаруви Раиси ваколатларини бошқа шахсга ўтказиш тўғрисидаги масала ўша умумий йиғилишнинг ўзида ҳал этилиши ёки Банк Бошқаруви Раисининг вазифасини вақтинча бажарувчи шахсни тайинлаган ҳолда яқин орадаги Акциядорларнинг умумий йиғилишида кўриб чиқиш учун қолдирилиши мумкин.

90. Банк Бошқаруви Раисининг ваколатларини тугатиш тўғрисида қарор қабул қилган Банк Кенгаши Банк Бошқаруви Раиси вазифасини вақтинча бажарувчи шахсни тайинлаш тўғрисида қарор қабул қилади, шунингдек Банк Бошқаруви Раиси тўғрисидаги масалани ҳал этиш учун Акциядорларнинг навбатдан ташқари умумий йиғилишини чақиради.

91. Банк Бошқаруви Раиси:

Акциядорлар умумий йиғилиши ва Банк Кенгаши қарорлари ижросини таъминлайди;

Банк номидан ишончномасиз ҳаракат қилади, бошқа ташкилотлар билан ўзаро муносабатларда унинг манфаатларини ифодалайди;

Ўзбекистон Республикаси қонун ҳужжатлари ва ушбу Уставда белгиланган доираларда мол-мулк ва пул маблағларини тасарруф этади;

Банк ташкилий тузилмасини аниқлайди, Банк қоидалари, иш тартиби ва бошқа локал ҳужжатларини тасдиқлайди, Акциядорлар умумий йиғилиши, Банк Кенгаши ва Банк Бошқаруви томонидан тасдиқланадиган локал ҳужжатлар бундан мустасно;

Банк Бошқаруви томонидан тасдиқланган локал ҳужжатларни имзолайди;

Банк, филиаллар ва ваколатхоналарнинг штатлар жадвалини тасдиқлайди;

ишончномалар беради;

банкларда Банкнинг вакиллик, валюта, ҳисоб-рақамлари ва бошқа ҳисоб-рақамларини очади;

бухгалтерлик ҳисоби ва ҳисоботини ташкил қилади;

Банк кундалик хужалик фаолиятини юритиш асосида содир этиладиган битимлар (шартномалар) тузади;

баланс қиймати ёки олиш қиймати битим тузиш тўғрисида қарор қабул қилинаётган санада Банк соф активлари миқдорининг беш фоизгача ташкил этувчи мол-мулкни Банкнинг олиши ёки тасарруфидан чиқариши билан боғлиқ битимларни тузади, уларни муддатини узайтиришни маъқуллаш, бундан мустасно;

ходимларни, шу жумладан бош бухгалтер, бўлинма, филиал ва ваколатхоналар раҳбарларини ишга қабул қилади ва ишдан бўшатади;

Банк ходимларини қонун ҳужжатларида ушбу Устав, Акциядорлар умумий йиғилиши ва Банк Кенгаши томонидан белгиланган тартибда рағбатлантиради, шунингдек уларни интизомий ва моддий жавобгарликка тортади;

Банк ходимларининг барчаси учун мажбурий бўлган буйруқлар ва кўрсатмалар чиқаради;

Акциядорлар умумий йиғилиши, Банк Кенгаши ва Банк тафтиш комиссияси фаолиятини ташкилий техникавий таъминлашни амалга оширади;

Ўзбекистон Республикаси қонун ҳужжатлари ва ушбу Уставга мувофиқ Банк фаолиятининг бошқа кундалик масалаларини ҳал қилади.

### **VIII. БАНКНИНГ МИНОРИТАР АКЦИЯДОРЛАРИ ҚЎМИТАСИ**

92. Миноритар акциядорларнинг ҳуқуқлари ва қонуний манфаатларини ҳимоя қилиш мақсадида Банкда уларнинг орасидан Миноритар акциядорларнинг қўмитаси ташкил этилиши мумкин.

93. Миноритар акциядорлар қўмитасининг таркибига номзодлар бўйича таклифлар Банкка Банк Кенгашига номзодлар бўйича таклифлар киритиш учун назарда тутилган тартибда ва муддатларда киритилади.

Миноритар акциядорлар қўмитасининг аъзоларини сайлашда Акциядорларнинг умумий йиғилишида ҳозир бўлган ва Банк Кенгашига номзодлар кўрсатмаган ёхуд

акциядорларнинг ўтказилаётган умумий йиғилишида Банк Кенгашига номзодлари сайланмаган акциядорлар иштирок этади.

Миноритар акциядорлар қўмитасининг таркибига Банк Бошқарув Раиси, Банк Бошқаруви аъзолари, шунингдек Банкнинг Кенгашига ва Тафтиш комиссиясига (тафтишчиси этиб) сайланган шахслар кириши мумкин эмас.

94. Миноритар акциядорлар қўмитасининг ваколатига қуйидагилар киради:

а) Акциядорларнинг умумий йиғилиши ёки Банкнинг Кенгаши кўриб чиқиши учун киритилаётган йирик битимлар ва аффилиланган шахслар билан битимлар тузишга оид масалалар бўйича таклифлар тайёрлашда иштирок этиш;

б) Миноритар акциядорларнинг ўз ҳуқуқлари ва қонуний манфаатларини ҳимоя қилиш билан боғлиқ муурожаатларини кўриб чиқиш;

в) қимматли қоғозлар бозорини тартибга солиш бўйича ваколатли давлат органига миноритар акциядорларнинг ҳуқуқлари ва қонуний манфаатларини ҳимоя қилиш тўғрисида муурожаатлар киритиш;

г) Ўзбекистон Республикаси қонунчилигига мувофиқ бошқа масалаларни кўриб чиқиш.

95. Миноритар акциядорлар қўмитасининг қарорлари оддий кўпчилик овоз билан қабул қилинади. Миноритар акциядорлар қўмитасининг мажлислари унинг миқдор таркибига сайланган шахсларнинг камида тўртдан уч қисми ҳозир бўлганда ваколатлидир.

96. Миноритар акциядорлар қўмитаси аъзоларининг сони 3 та дан иборат.

97. Миноритар акциядорларнинг қўмитаси қабул қилинган қарорлар тўғрисида ҳар йили Акциядорларнинг умумий йиғилишида ҳисобот беради.

98. Миноритар акциядорлар қўмитасининг Раиси ушбу қўмита таркибидан миноритар акциядорлар қўмитасининг аъзолари томонидан кўпчилик овоз билан сайланади.

99. Миноритар акциядорлар қўмитаси Банкнинг хўжалик фаолиятига аралашшига ҳақли эмас.

Миноритар акциядорлар қўмитасининг фаолиятига Банк Кенгашининг ёки Банк Бошқарувининг аралашувига йўл қўйилмайди.

## **IX. БАНК ҲИСОБИ ВА ҲИСОБОТИ**

100. Банк Ўзбекистон Республикаси қонун ҳужжатларида белгиланган тартибда бухгалтерия ҳисобини юритиш ва молиявий ҳисоботни тақдим этиши шарт.

101. Банкда бухгалтерия ҳисобининг ташкил этилиши, ҳолати ва ишончилиги, тегишли органларга ҳар йилги ҳисобот ва бошқа молиявий ҳисоботлар, шунингдек Банкнинг расмий веб-сайтида ва оммавий ахборот воситаларида акциядорларга, кредиторларга тақдим этиладиган банк фаолияти тўғрисидаги маълумотлар ўз вақтида тақдим этилиши учун жавобгарлик Банк Бошқаруви зиммасида бўлади.

Банк сўралаётган ҳужжатларни акциядорга электрон шаклда тақдим қилишга ҳақли.

Акциядорлар банк ёки унинг фаолияти тўғрисидаги хизмат, тижорат сирини ёки қонун билан қўриқланадиган бошқа сирни ташкил этувчи ахборотни ошкор қилишга ҳақли эмас.

102. Банкнинг молиявий ҳисоботида кўрсатилган ва Акциядорларнинг умумий йиғилишига тақдим этиладиган молиявий ҳисоботдаги, бухгалтерия балансидаги, фойда ва зарарлар ҳисобварағидаги маълумотларнинг ишончлилиги мулкрий манфаатлари Банк ёки унинг акциядорлари билан боғлиқ бўлмаган аудиторлик ташкилоти томонидан тасдиқланган бўлиши керак.

103. Банкнинг йиллик ҳисоботи Акциядорларнинг йиллик умумий йиғилиши ўтказиладиган санадан камида 10 кун олдин Банк Кенгаши томонидан дастлабки тарзда тасдиқланиши лозим.

104. Йиллик баланс ҳамда фойда ва зарарлар тўғрисидаги ҳисоботлар Акциядорлар умумий йиғилиши томонидан тасдиқланади.

105. Тақдим этилган маълумотларнинг тўғрилигини мустақил аудиторлик ташкилоти ва Банк тафтиш комиссияси тасдиқлагандан сўнг, банк қонун ҳужжатларида белгиланган муддатларда молиявий ҳисоботини эълон қилади.

Банк Халқаро молиявий ҳисобот стандартларига мувофиқ тузилган йиллик молиявий ҳисоботни у Халқаро аудит стандартларига мувофиқ ташки аудитдан ўтказилганидан кейин акциядорларнинг йиллик умумий йиғилиши ўтказиладиган санадан камида икки ҳафта олдин эълон қилиши шарт.

106. Банкнинг операцияларини бажарадиган йил 1 январда бошланади ва 31 декабрда тугайди.

## **Х. БАНКНИНГ МОЛИЯ-ХЎЖАЛИК ФАОЛИЯТИНИ НАЗОРАТ ҚИЛИШ**

107. Банкнинг молия-хўжалик фаолият устидан назоратни амалга ошириш учун Акциядорлар умумий йиғилиши томонидан 3 кишидан иборат таркибда Банк тафтиш комиссияси сайланади.

Банк тафтиш комиссияси Акциядорлар умумий йиғилишининг қарори бўйича қайта сайланиш ҳуқуқи билан бир йилга сайланади. Айти бир шахс Банкнинг тафтиш комиссияси таркибига кетма-кет уч мартадан ортиқ сайланиши мумкин эмас.

Банк тафтиш комиссияси аъзолари бир вақтнинг ўзида Банк Кенгаши аъзоси бўла олмайди, шунингдек банкда меҳнати шартномаси бўйича ишга ёлланиши мумкин эмас.

108. Банк тафтиш комиссиясининг аъзоларига доир малака талаблари, ваколати ва фаолияти тартиби қонун ҳужжатлари, ушбу Устав ва Акциядорлар умумий йиғилишида тасдиқлаган Банк тафтиш комиссияси тўғрисидаги Низомда белгиланади.

109. Банкнинг молия-хўжалик фаолиятини текшириш Банк тафтиш комиссиясининг (тафтишчининг), Акциядорлар умумий йиғилишининг, Банк Кенгашининг ташаббусига кўра ёки Банк акцияларининг камида беш фоизига эгаллик қилувчи акциядорнинг (акциядорларнинг) талабига кўра Банк Кенгашини олдиндан хабардор қилиш йўли билан бир йиллик ёки бошқа давр ичидаги фаолият якунлари бўйича амалга оширилади.

110. Банк тафтиш комиссияси банк фаолиятини тартибга солувчи қонун ҳужжатлари ва бошқа ҳужжатларга риоя қилиниши, Банк ички назорати ўрнатилиши, Банк томонидан йил давомида (ялпи ёки танлаб текшириш) ўтказилган кредит, ҳисоб-китоб ва бошқа операциялари, касса ва мол-мулкнинг ҳолатини текширади.

111. Банк тафтиш комиссияси Ўзбекистон Республикаси қонун ҳужжатлари ва ушбу Уставга мувофиқ навбатдан ташқари Акциядорлар умумий йиғилишини чақириш ҳуқуқига эга.

112. Банкнинг молия-хўжалик фаолиятини текшириш яқунларига кўра Банк тафтиш комиссияси хулоса тайёрлайди, бу хулосада:

ҳисоботларда ва Банкнинг бошқа молия ҳужжатларида акс эттирилган маълумотлар қай даражада тўғрилигига баҳо берилади;

бухгалтерия ҳисобини юритиш ва молия ҳисоботини тақдим этиш тартиби, шунингдек молия-хўжалик фаолиятини амалга ошириш чоғида қонун ҳужжатлари бузилганлиги тўғрисида ахборот берилади.

Банк тафтиш комиссияси Банкда аффилиланган шахслар билан тузилган битимлар ёки йирик битимлар мавжудлиги, шунингдек қонун ҳужжатларининг ва Банк ички ҳужжатларининг бундай битимларни тузишга доир талабларига риоя қилиниши тўғрисидаги хулосани ҳар чоракда Банк Кенгашининг мажлисига олиб чиқади.

113. Ички аудит хизмати Банкнинг ижроия органи, ваколатхоналари ва филиаллари томонидан қонун ҳужжатлари, Банк устави ва бошқа локал ҳужжатларга риоя этилишини, бухгалтерия ҳисоби ва молиявий ҳисоботларда маълумотларнинг тўлиқ ҳамда тўғри акс эттирилиши таъминланишини, хўжалик операцияларини амалга оширишнинг белгиланган қоидалари ва тартиб-таомилларига риоя этилишини, активларнинг сақланишини, шунингдек банкни бошқариш юзасидан қонун ҳужжатларида белгиланган талабларга риоя этилишини текшириш ва бу борада мониторинг олиб бориш орқали уларнинг ишини назорат қилади ҳамда баҳолайди.

114. Ички аудит хизмати Банк Кенгаши олдида ҳисобдордир.

115. Банк аудити мустақил аудиторлик ташкилотлари томонидан ҳар йили олиб борилади. Аудиторлик ташкилоти Банк билан тузилган шартномага мувофиқ қонун ҳужжатларида белгиланган тартибда Банкнинг молия-хўжалик фаолиятини текширади ва унга аудиторлик хулосасини тақдим этади.

116. Аудиторлик ташкилоти Банкнинг молиявий ҳисоботи ва молияга доир бошқа ахборотлар ҳақида нотўғри хулоса баён этилган аудиторлик хулосаси тузганлик оқибатида етказилган зарар учун Банк олдида жавобгар бўлади.

117. Аудиторлик текширувларидан мақсад аудиторларнинг қуйидагилар билан боғлиқ ҳолис фикрини олиш ҳисобланади:

Банкнинг молиявий ҳисоботлари ишончлилиги ва уларнинг миллий ва халқаро бухгалтерия ҳисоби стандартларига мувофиқлиги;

ички назорат тизимини ташкил қилиш ва ички назорат тартиб-таомилларига риоя этилиши;

Банкнинг банк қонунчилигига ва Марказий банк меъёрий ҳужжатларига риоя этиши; банклар билан ўзаро муносабатларида олиб борилган операциялари, унинг молиявий фаолияти, бухгалтерлик ҳисоби ва маъмурий назорат тизимининг тўғрилиги ва самарадорлиги.

## **XI. БАНКНИ ҚАЙТА ТАШКИЛ ҚИЛИШ ВА ТУГАТИШ**

118. Банкни қайта ташкил этиш Ўзбекистон Республикаси Фуқаролик Кодексининг 49-53 моддалари, шунингдек, «Акциядорлик жамиятлари ва акциядорларнинг ҳуқуқларини ҳимоя қилиш тўғрисида»ги Ўзбекистон Республикаси Қонунининг 92-101 моддаларига мувофиқ амалга оширилади.

119. Банкни қайта ташкил этиш Акциядорлар умумий йиғилишининг қарорига кўра қўшиб юбориш, қўшиб олиш, бўлиш, ажратиб чиқариш ва ўзгартириш шаклларида Марказий банкдан рухсатнома олган ҳолда амалга оширилади.

120. Банк уставига Банкнинг қайта ташкил этилиши муносабати билан киритилган ўзгартириш ва қўшимчалар қонунчилик ва Марказий банкнинг меъёрий ҳужжатларида белгиланган тартибда рўйхатга олинади.

121. Акциядорлар умумий йиғилиши томонидан Банкни қайта ташкил этиш тўғрисидаги қарор қабул қилинганидан кейин қайта ташкил этилаётган банк 30 кундан кеч бўлмаган муддатда ёзма равишда маълум қилиш ва камида иккита марказий газеталарда тегишли эълон бериш йўли билан ўз кредиторларини келгусидаги ўзгаришлар ҳақида хабардор қилиши шарт.

122. Банкни тугатиш тартиби Ўзбекистон Республикаси Фуқаролик Кодексининг 53-56 моддалари, шунингдек, «Акциядорлик жамиятлари ва акциядорларнинг ҳуқуқларини ҳимоя қилиш тўғрисида»ги Ўзбекистон Республикаси Қонунининг 98-101 моддаларига мувофиқ амалга оширилади.

123. Банк ўз фаолиятини қуйидаги ҳолларда тўхтатади:  
Акциядорлар умумий йиғилиши қарори бўлганда;  
Ўзбекистон Республикаси амалдаги қонун ҳужжатларига мувофиқ суд қарорига асосан;  
Марказий банк томонидан лицензия чақириб олинганда;  
банкрот деб эълон қилинганда;  
амалдаги қонун ҳужжатларида назарда тутилган бошқа сабабларга асосан.

124. Банкни тугатиш тўғрисидаги қарор қабул қилинганидан сўнг Банк Акциядорларининг умумий йиғилиши Тугатиш комиссиясини тайинлайди.

125. Тугатиш комиссияси тайинланган вақтдан бошлаб унга Банк ишларини бошқариш ваколати ўтади.

126. Тугатиш комиссияси:  
Банкнинг тугатилиши, унинг кредиторларининг талаб қўйиш тартиби ва муддатлари тўғрисидаги хабарни тегишли матбуот органида эълон қилади. Кредиторларнинг талаб қўйиш муддати Банк тугатилиши тўғрисидаги хабар эълон қилинган санадан эътиборан икки ойдан кам бўлмаслиги лозим;  
кредиторларни аниқлаш ва дебиторлик қарзларини олиш чора-тадбирларини кўради, шунингдек, кредиторларни Банкни тугатилиши тўғрисида ёзма хабардор қилади;  
Банкнинг мол мулкини баҳолайди.

127. Кредиторлар томонидан талабларни қўйиш учун белгиланган муддат туганидан сўнг Тугатиш комиссияси оралиқ тугатиш балансини тузади. Мазкур балансда тугатилаётган Банк мол-мулкининг таркиби, кредиторлар қўйган талаблар, шунингдек, уларни уларни қараб чиқиш натижалари тўғрисидаги маълумотлар бўлади. Оралиқ тугатиш баланси акциядорлар умумий йиғилиши томонидан Марказий банк билан келишилган ҳолда тасдиқланади.

128. Агар Банкнинг мавжуд пул маблағлари кредиторларнинг талабларини қондириш учун етарли бўлмаса, Тугатиш комиссияси Банкнинг бошқа мол-мулкни ким ошди савдосида сотишни амалга оширади.

129. Тугатилаётган банк кредиторларига пул суммаларини тўлаш Тугатиш комиссияси томонидан оралиқ тугатиш балансига мувофиқ қонун ҳужжатларида белгиланган навбат тартибида мазкур баланс тасдиқланган кундан эътиборан амалга оширилади.

130. Кредиторлар билан ҳисоб-китоб тугагандан кейин Тугатиш комиссияси тугатиш балансини тузади. Тугатиш баланси Акциядорлар умумий йиғилиши томонидан Марказий банк билан келишилган ҳолда тасдиқланади.

131. Кредиторлар билан ҳисоб-китоб тугагандан кейин Банкнинг қолган мол-мулки Тугатиш комиссияси томонидан акциядорлар ўртасида қуйидаги навбат бўйича тақсимланади:

биринчи навбатда қонун ҳужжатларига мувофиқ қайтариб сотиб олиниши лозим бўлган акциялар бўйича тўловлар амалга оширилади;

иккинчи навбатда тугатилаётган банкнинг мол-мулкни оддий акцияларнинг эгалари бўлмиш акциядорлар ўртасида тақсилаш амалга оширилади.

132. Мол-мулкни ҳар бир навбат бўйича тақсимлаш аввалги навбат тартиби бўйича мол-мулк тўлиқ тақсимлаб бўлингандан кейин амалга оширилади.

133. Чет эллик инвестор мол-мулк тугатиш қийматининг ўзи олган қисмини белгиланган тартибда айирбошлашга ҳақлидир.

134. Ўзбекистон Республикаси Марказий банки Банкни ягона давлат реестридан ўчириб ташлаган вақтдан эътиборан Банкни тугатиш тамомланган, Банк эса фаолиятини тугатган ҳисобланади.

135. Банкни қайта ташкил этиш ёки тугатиш ҳақидаги хабар матбуотда эълон қилинади.

136. Тугатиш комиссияси ноқонуний ёки атайин нотўғри қилинган ҳаракатлар (ҳаракатсизлик) натижасида Банкка келтирилган зарар учун жавобгардир.

## **ХII. БАНК УСТАВИГА ЎЗГАРТИРИШ ВА ҚЎШИМЧАЛАР КИРИТИШ**

137. Банк уставига ўзгартириш ва қўшимчалар киритиш Акциядорлар умумий йиғилиши томонидан ёки ваколати доирасида Банк Кенгаши томонидан амалга оширилади. Банк уставини янги таҳрирда қабул қилиш Акциядорлар умумий йиғилиши қарори бўйича амалга оширилади.

138. Банк уставига ўзгартириш ва қўшимчалар киритиш ёки Банк уставини янги таҳрирда қабул қилиш банкни рўйхатга олиш учун Ўзбекистон Республикаси қонун ҳужжатларида кўрсатилган тартибда давлат рўйхатидан ўтказилиши лозим.

139. Банк Уставига ўзгартириш ва қўшимчалар киритиш учинчи шахслар учун давлат рўйхатидан ўтказилган вақтдан кучга киради.